

第廿七

芳蘭軒集

二薇亭集

知稼翁集

後村集

廿七

柳田文庫
文庫11
D 156
27

文獻 11
D 156
27

芳蘭軒詩鈔

徐照字道暉永嘉人自號山民有詩數百斷思尤奇皆
橫絕欵起冰懸雪跨使讀者變蹕慘慄官首吟嘆不自
已然無異語皆人所知也人不能道爾嘉定四年卒

自君之出矣三首

自君之出矣。心魂遠相隨。拆破唐人絹。經經是雙絲。
自君之出矣。玉琴生塵垢。蓮子種成荷。曷時可成藕。
自君之出矣。懶粧眉黛濃。愁心如屋漏。點點不移蹤。

春日曲

中婦掃蠶蟻。挈籃桑葉間。小姑摘新茶。日斜下前山。

莫愁曲

莫愁石城住。今來無莫愁。只重石城水。曾汎莫愁舟。



010190554290

48-12198

三峽吟

山水七百里。上有青楓林。啼猿不自愁。愁落行人心。

蝗飛高

戰士屍上蟲。蟲老生翅翼。日怒體甲硬。豈非怨氣激。櫛櫛
北方來。橫遮遍天黑。戍婦聞我言。色變氣咽逆。良人進戰
死。屍骸委砂磔。昨夜魂夢歸。白騎曉無迹。因知天中蝗。乃
是屍上物。仰面久迎視。低頭淚雙滴。呼兒勿殺害。解繫從
所適。蝗乎若有知。飛入妾心臆。

妾薄命

初與君相知。便欲肺腸傾。只擬君肺腸。與妾相似生。徘徊
幾言笑。始悟非真情。妾情不可收。悔息淚盈盈。

廢居行

北風蕭蕭邊馬鳴。邊人走盡空戶庭。黃金埋藏禾米棄。路
上逐日長飢行。子西父南弗相守。仰面看日啼無聲。生身
不合屬中土。自昔無時無戰爭。家桑椹熟生野蛾。跳席
箕田成坡。一路幾州盡荒廢。處處戰骨平草多。傳報將軍
殺。取得山河。主殘生只願還本鄉。難保後裔無
兵禍。

促促詞

促促復促促。東家歡欲歌。西家悲欲哭。丈夫力耕長忍飢。
老婦勤織長無衣。東家鋪君不出戶。父為節級兒抄簿。一
年兩度請官衣。每月請米一石五。小兒作軍送文字。一句
一輪怨辛苦。

征婦息

年。半。爲。郎。婦。郎。去。戍。采。石。又。云。戍。壕。梁。不。得。真。消。息。半。年。無。信。歸。獨。自。守。羅。幃。西。風。吹。妾。寒。倩。誰。寄。郎。衣。姑。老。子。在。腹。憶。郎。損。心。目。願。郎。征。戰。早。有。功。生。子。有。蔭。姑。有。封。

青鳩詞

勞。勞。復。勞。勞。生。人。半。行。客。今。人。行。古。道。古。道。有。行。役。相。逢。莫。等。閒。相。離。易。疎。隔。殷。勤。紅。杏。花。徹。宵。對。芳。席。明。年。花。開。人。東。西。青。鳩。食。花。舊。處。啼。

何所歸

簦。簪。下。後。灣。羈。罟。下。前。浦。遊。鱗。棲。身。更。何。所。

柳葉詞

嫩。葉。吹。風。不。自。持。淺。黃。微。綠。映。清。池。玉。人。未。識。分。離。恨。折。向。堂。前。學。畫。眉。

越魚吟

越。魚。生。水。中。專。食。水。上。禽。禽。又。安。知。魚。魚。自。生。機。心。越。魚。早。來。人。釣。得。人。却。放。之。反。不。食。

分題得漁村晚照

漁。師。得。魚。繞。溪。賣。小。船。橫。繫。柴。門。外。出。門。老。嫗。喚。雞。犬。收。斂。蓑。衣。屋。頭。曬。賣。魚。得。酒。又。得。錢。歸。來。醉。倒。地。上。眠。小。兒。啾。啾。問。煮。米。白。鷗。飛。去。蘆。花。烟。

宿翁靈舒幽居期趙紫芝不至

江。城。過。一。宿。秋。氣。入。霄。濃。蛩。響。移。砧。石。螢。光。出。瓦。松。月。遲。將。近。曉。角。盡。卽。聞。鐘。人。起。行。庭。際。息。君。恨。幾。重。

贈江心寺欽上人

客。至。啓。幽。戶。筍。鞋。行。曲。廊。潮。侵。坐。禪。石。雨。潤。讀。經。香。古。硯。

傳人遠。新篁過塔長。城中如火熱。此地獨清涼。

白下

白下嚴州近。崎嶇昔未經。年豐山米賤。溪澗石苔腥。一月無新句。千岑役瘦形。人家今喪虎。未晚戶先扃。

贈劉明遠

一生嫌世俗。不向市中居。既是未攀桂。却堪同釣魚。疾除禪老藥。詩答野人書。又說成丹鼎。吾生愧不如。

送塵老入廣化米開田

行李衝冰雪。塗程半是船。去從人乞米。歸要海成田。遇景因開畫。思茶亦掬泉。好風名船舶。相候立江邊。

送朱巖伯

好別無愁思。風霜一歲成。去因貧事迫。歸有暮年安。遠水

維舟晚。青山遶舍寒。有誰憐靜者。得句不同看。

途中

隻影微陽外。青山自鬱盤。未經千里遠。欲寄一書難。埃礪苔侵字。魚塘水過欄。西風吹樹葉。不問客衣單。

還舊山作

雲駁天初霽。携兒下短篷。數莖歸鬢白。一袖俗塵空。日子差潮候。秋容在蓼叢。江神應念我。平穩不生風。

宿寺

古殿清燈冷。虛廊葉掃風。拚闌人迹外。得句佛香中。鶴睡應無夢。僧談必悟空。坐驚恣欲曉。片月在林東。

題江心寺

兩寺今爲一。僧多外國人。流來天際水。截斷世間塵。鴉宿

腥林徑。龍歸損塔輪。却疑成片石。坐對謝公身。

題羅隱故居

片水靜無塵。青山是四鄰。上天如有意。此地着詩人。吟得物俱盡。罰令生世貧。因來尋古跡。只見石爲麟。

題桃花夫人廟

一樹桃花發。桃花卽是君。空祠臨野水。何處覓行雲。事迹樵人說。爐香過客焚。雨添碑上蘚。難讀古詩文。

送李偉歸黃山

心知無白髮。長帶一琴行。幾路到君屋。數峰當郡城。妻兒貧自樂。丹藥歲燒成。未必聖明代。終令隱姓名。

懷如順上人

西湖湖上寺。一別二三年。舊住房長閉。新栽樹已圓。空多

相憶夢。不得寄來篇。喜見鄰僧說。歸期是臘前。

訪觀公不遇

卧犬聞人出。門當青櫟林。因知多不在。自願欲相尋。宵短餘香印。鄰疎出磬音。昨來曾寄茗。應念苦吟心。

哭居塵禪師

今朝聞笛信。一隻海船遙。此世永相隔。何僧可與交。茶從秋後盡。門鎖月中敲。昨夜山家夢。親曾到石橋。

衰柳

風吹無一葉。不復翠成窠。枝脆經霜氣。根空入水波。寒栖江鷺早。暗出野螢多。廢苑荒堤外。人嗟舊迹過。

鷺鷥

一點白如雪。頂黏絲數莖。沙邊行有迹。空外過無聲。高柳

東方穩危灘立不驚每看閑意思漁父是前生

登歙山寺

石徑半欹傾山頭路始平步因花樹息吟忘寺僧迎一面
門無水東隅路入京青峰三十六霜曉見分明

山中即事

着屐上崔嵬呼兒注瓦杯千岑經雨後一雁帶秋來野艇
乘湖發山園逐主開餘生落樵牧門巷少塵埃

題道上人房老梅

香有竹風知無塵雜野姿為憐新白髮重記舊題詩
龍鱗剝蜂沾蠹屑垂不來三十載半樹是孫枝

石門瀑布

一派從天下曾經李白看千年流不盡六月地長寒灑木

跳微沫衝崖作怒湍人言深碧處常有老龍盤

宿永康

路有三千里春容若未濃淺塘飢鷺下晴霽市煙衝孤望
生遙息頻過記昔蹤宿程知近縣聞打法燈鐘

題衢州石壁寺

岸石橫生脈平林一里溪眾船寒渡集高寺遠山齊殘磬
吹風斷眠禽壓竹低自嫌昏黑至難認壁間題

題信州趙昌甫林居

譜接江西派聲名過浙間棄官從早歲買屋向深山文集
通僧借漁舟載鶴還待予歸舊里又得到柴關

路逢楊嘉猷赴官嚴州

詩合誠齋意難將片石鐮相逢因在道惜別未移船野步

僧同坐。宵吟吏廢眠。思君還有夢。前到釣臺邊。

過鄱陽湖

港中分十字。蜀廣亦通連。四望疑無地。孤舟若在天。龍尊收巨浪。鷗小沒蒼煙。未渡皆驚畏。吾今已帖然。

題鄴林

穢爲登山遠。當門疊石爲。人來嗟故迹。景勝入名詩。立鶴

宿吉州永慶寺

古邑溪邊寺。吟人愛寂寥。少僧齋室廢。乞食釣鄉遙。鐘韻含霜氣。樓簷近斗杓。漢時銅鑄佛。瞻禮到今朝。

題浯溪

知是漫郎宅。舟中聞寺鐘。小溪通正港。高石壓羣峰。綠木

成春陰。荒臺見古蹤。唐碑三十本。獨免野苔封。

永州書懷

嗜茶疑是病。羸瘦見詩形。天斷征鴻過。汀多香草青。興高貧不覺。身遠事皆經。歸路當遊獄。僧言極可聽。

湖中別鄧諫

隔水鷓鴣鳴。一汀香草生。自怜爲客久。誰忍送君行。後會期何日。歸途喜乍晴。它春科甲上。必欲見題名。

筠州送趙院判歸九江

相逢今半月。夜雨厭同聞。遠地長爲客。還家極羨君。詩低勞盡寫。茶美許重分。一馬衝寒去。廬峰正雪雲。

移家鴈池

不向山中住。城中住此身。家貧兒廢學。寺近佛爲鄰。雪長

官河水鴻驚釣渚春。夜來遊嶽夢重見日東人。

懷趙紫芝

一別一百日無書直至今。幾回成夜夢。獨自廢秋吟。小雪衣猶給。荒年米似金。知音人亦有。誰若爾知心。

送爽上人化緣

專志事皆成。期師此一行。閣盛靈佛像。碑載施人名。江濶風催渡。村深雪廢程。暫勞曾共說。終可送閑情。

白石巖

一石入遙天。千峰疊在前。人行不到處。仙去未多年。竇暗雲生像。簷斜日照泉。皇朝宣賜物。弟子尚能傳。

題薛景石瓜廬

何地有瓜廬。平湖四畝餘。自鋤畦上草。不放手巾書。人遠來求字。童閑去釣魚。山民山上住。却羨水邊居。

壽昌道中

碣字芙蓉驛。喜行行不難。路侵滄海過。人得異山看。圓石蟻粘滿。平途鷺立寒。一遊期一月。回日必冬殘。

龍湫瀑布

飛下數千尺。全然無定形。電橫天日射。龍出石雲腥。壯勢春曾看。寒聲佛共聽。昔人云此水。洗目最能靈。

靈峰

我來無一語。閑認昔遊蹤。誰種路旁樹。却遮山上峰。潭乾沉石露。人立去禽衝。樵說仙橋險。因思在上封。

石門庵

庵是何年作。其中住一僧。蒼崖從古險。白日少人登。衆物

清相映吾生隱未能。夜來新過虎。抓折樹根藤。

題夏景清湘中閣

湘中山與水。自古有人云。此是曾遊地。今來盡屬君。殘風吹岸草。空廟入江雲。却憶還鄉夢。清猿半夜聞。

題翁卷山居二首

十年前有約。今却在城居。羨爾能攜子。深山自結廬。引泉移岸石。栽藥就園蔬。見說高林外。樵人聽讀書。

空山無一人。君此寄閑身。水上花來遠。風中葉動頻。蟲行黏壁字。茶煮落巢薪。若有高人至。何妨不裹巾。

病中作

一行三步歇。屋漏坐頻移。妻欲藏茶鼎。僧能施藥資。鄰園梅發盡。河岸草生遲。天解怜貧病。難令不作詩。

未廻車

山川匪遙遠。行人未廻車。欲語昨宵夢。忽接今朝書。啼鳥在屋上。綠草生庭除。仰看日月光。照知子衿裾。

謝徐璣惠茶

建山惟上貢。采樹極艱辛。不擬分奇品。遙將寄野人。角開秋月滿。香入井泉新。靜室無來客。裨黏陸羽真。

中夕

中夕獨依依。閑行未掩扉。水邊山出月。松上雨沾衣。棹響初如近。螢光漸欲稀。不甘塵內事。長與此心違。

題丁少瞻林園

州分低嶺外。來向此園行。路改初栽樹。堂成未有名。藥苗如草長。巖溜入池清。欲識懷君意。時聞鶴一鳴。

訪僧居

客至無他事。房門不厭敲。好山元帶郭。損屋旋鋪茅。靜砌生靈藥。高林出遠郊。水禽多不見。春暖漸營巢。

永州寄翁靈舒

古郡百蠻邊。蒼梧九點烟。去家疑萬里。歸計在明年。風順眠聽角。樓高望見船。筠州當半道。長得秀詩篇。

能仁寺

寺置有碑傳。觀音巖石前。殿高燈焰短。山合磬聲圓。牕靜吹寒雪。春鳴落夜泉。病遊人豈識。謂不似秋天。

題李商叟半村壁

一徑蒼苔合。連年不出門。風高松有韻。溪滿石無痕。不自知名重。令人覺道尊。更憂徵詔至。移室向深村。

訓翁常之

半掩柴門一徑深。山中免見俗塵侵。愁因有酒春生面。老不饒貧雪滿簪。舊井遠通幽谷水。翠巖深小窓陰扁舟莫負林間約。好把清詩慰此心。

贈從善上人

骨氣清冷無片塵。卽應僧可是前身。詩因圓解堪呈佛。碁與禪通可悟人。掃地就涼松日少。煮茶消困石泉新。不能來往城中寺。去買青山約我鄰。

山中寄翁卷

忽看春至復春還。門外煙雲沒野山。吟有好懷忘瘦苦。貧多難事壞清閑。柳花未散色全綠。杜宇乍啼聲更蠻。聞到掃松溪雨後。夢隨溪雨到巖關。

送塵老歸舊房

數間茅屋殘山外。片石凌巒樹影交。給假兩旬秋易盡。相尋一舍路非遙。盆栽怪木緣能畫。池蓄珍魚不入庖。聞道水松三百步。夢隨流水到溪橋。

會飲鮑使君池亭

案上一琴書數卷。不須此處有笙歌。厭居城市觀天小。喜到君家見月多。葉滿地飛隨步履。鶴於人熟聽吟哦。明朝也向山中去。手把松枝養太和。

宿翁卷書齋

一山秋色同誰看。又復相尋出郭來。隣竹種成高礙月。井泉汲少近生苔。忽驚寒事砧初動。不辨晴光戶盡開。君愛苦吟吾喜聽。世人誰肯重清才。

同劉孝若野步

杖履相從步野山。坐臨峭壁和詩篇。要看隔水人家菊。試借繫門漁父船。且緩歸舟知有月。不生酒興爲無錢。寒來莫問家中事。纔得身閑卽是仙。

酬贈徐璣

每到齋門啟始應。池禽雙戲動清波。愛閑却道無官好。住僻如嫌有客多。字學晉碑終日寫。詩成唐體要人磨。山民百事今全懶。祇合煙江着短莎。

高山寺晚望

石路近門方不險。刺桐疎處見僧歸。小波重疊無平屋。四
月陰寒尚袂衣。山到道州高莫比。水分湘口綠相圍。暮雲
不隔東南望。一片遙兼白鳥飛。

題趙運管吟篷

飛塵難到碧波中。波上煙雲盡不同。吟斷不知鷺鷥起。汀花一半在船篷。

舟上

小船停漿逐湖邊。四五人家住一灣。貪看曉光侵月色。不知雲氣失前山。

開水

燈光難照客懷開。忽聽寒聲響似雷。天氣無風樹無葉。道州半夜水流來。

杜甫墳

來陽知縣非知己。救厄無蹤豈忍聞。若更聲名可埋沒。行人定不弔空墳。

題趙明叔新居

社壇側近地圖寬。所作園池在此間。十萬人家城裏住。少聞人有對門山。

題張提舉西野

渡頭風景如前日。誰種桃花在兩邊。未晚人家門戶閉。鷺鷥閑立釣魚船。

懷趙紫芝翁靈舒

紫芝別我天台去。翁十深山自結茅。但見春愁隨日長。不知庭葉蔽禽巢。

李溪曲別鄭遇

七十二灘聲共聞。一朝路向李溪分。梅花無情動春夢。未好憶家先憶君。

寄家書作

屋頭桑葉大如錢。知是吳蠶第一眠。遠水忽來瀟岸沒。家書却寄道州船。

三薇亭詩鈔

徐璣字文淵。從晉江遷永嘉。歷官建安主簿。龍溪丞。武當長。泰令。嘉定七年卒。年五十九。初唐詩廢久。璣與其友徐照翁卷。趙師秀。議曰。昔人以浮聲切響。單字隻句。計巧拙。蓋風騷之至精也。近世乃連篇累牘。汗漫而無禁。豈能名家哉。四人之語。遂極其工。而唐詩由此復行。曹能始以璣為照之弟。按水心二徐墓誌。既不同派。而其詩卷亦各以名相呼。有以知其不然矣。

訪梅

訪梅行近郊。寒氣初漸瀝。欲開未開時。三點兩點白。清枝何蕭疎。幽香况岑寂。頗知天姿殊。絕似人有德。逢君天一。方歡然舊相識。

監造御茶有所爭執

森森壑源山。嫋嫋壑源溪。脩脩桐樹林。下蔭茶樹低。桐風
日夜吟。桐雨灑霏霏。千叢高下青。一叢千萬枝。龍在水底
吟。鳳在山上飛。異物呈嘉祥。上奉玉食資。臘餘春未新。素
質蘊芳菲。千夫喏登壠。叫嘯風雷隨。雪芽細若針。一夕吐
清奇。天地發寶秘。神鬼不敢知。舊制尊御膳。授職各有司。
分綱製品目。簿尉監視之。雖有領督官。焉得專所爲。初綱
七七夸。次綱數弗差。一以薦郊廟。二以淪賓夷。天子且謙
受。他人奚可希。奈何貪瀆者。憑陵肆姦欺。品嘗珍妙餘。倍
稱來其私。初作狐兒媚。忽變狼虎威。巧計百不行。叱怒面
欲緋。再拜長官前。茲事非所宜。性命若螻蟻。蠢動識尊卑。
朝廷設百官。責任無細微。所守儻在是。恪謹焉可違。君一
臣取二。千古明戒垂。以此得重劾。刀鋸弗敢辭。移官責南
浦。奉命去若馳。回首鳳凰翼。雨露生光輝。

述夢寄趙靈秀

江水何滔滔。渡江相別離。揖子家舍前。對子衣披披。問子
何所爲。旅舍未得歸。執手一悲歎。驚覺妻與兒。起坐不得
省。清風在簾帷。平明出南門。將以語所知。過子舊家處。寒
花出疎籬。蕭蕭黃葉多。裊裊歸步遲。子去不早還。何以慰
我思。

漳州別王仲言

百草各有種。春至不栽培。交情重故知。豈論才不才。相識
十年初。再見天之涯。共飲一杯酒。粲若紅顏開。人生有此
樂。知復能幾回。契濶幾已深。矧爾病與衰。朔風從何來。吹

發枝上梅。天寒日欲暮。又乃行色催。君去江水西。我歸近
天台。東西道路長。未可心膂摧。明朝碧雲多。佇息良徘徊。

投楊誠齋

名高身又貴。自住小村深。清得門如水。貧惟帶有金。養生
非藥餌。常語是規箴。四海爲儒者。相逢問信音。

江亭臨眺

問得梅花信。寒林動晚聲。雨來山漸遠。潮去水還清。寥落
尋新句。歡娛解宿醒。相攜歸路滑。燈火近孤城。

同友人登翠麓亭

緩行循翠麓。凝睇俯清灣。舟楫蘆花外。江山夕照間。天寒
雖日短。歲晚亦身閑。高樹梅初發。與君相共攀。

中川別舍弟

中川人語別。南國夜何其。江迥風來急。山低月落遲。纜從
前浦遠。角在古城吹。五畝耕鋤地。何當手共犁。

冬日書懷

門庭黃葉滿。園樹盡玲瓏。寒水終朝碧。霜天向晚紅。蔬餐
如野寺。茅舍近溪翁。非是分鷺寂。由來趣不同。

黃碧

黃碧平沙岸。陂塘柳色春。水清知酒好。山瘦識民貧。鷄犬
田家靜。桑麻歲事新。相逢行路客。半是永嘉人。

西征有寄翁趙徐三友

窮冬逆旅身。薄宦此艱辛。渡水添愁思。看山憶故人。煙生
村落晚。雨過竹松新。昨夜還鄉夢。逢君苦未真。

送趙靈秀赴筠州幕。子亦將之湖外。

郡以竹爲名。因知此地清。溪來城下綠。山到市邊平。入幕非無客。能文必有聲。江湖共游宦。相望若爲情。

湘水

湘水幾千里。平流少激湍。數家分市井。列石起峰巒。豈是昔曾到。猶疑畫上看。吟詩身漸老。向此作微官。

泊舟呈靈暉

泊舟風又起。繫纜野桐林。月在楚天碧。春來湘水深。官貧患近闕。地遠動愁心。所喜同舟者。清羸亦好吟。

古郡

古郡依蠻楚。身來作冷官。老憐兄弟遠。貧喜婦兒安。分菊乘春雨。移梅待歲寒。又傳家信至。入夜着燈看。

憑高

憑高散幽策。綠草滿春坡。楚野無林木。湘山似水波。客懷隨地改。詩思出門多。尚有溪西寺。斜陽未得過。

送徐照先回江右

骨體先如鶴。離家歲已周。欲知詩思遠。曾共楚鄉游。窮達身將老。分攜菊正秋。江西看舊友。歸計少遲留。

別趙黃中

世道難爲友。相期一見中。但令心事合。不在語言同。秋早相煙白。舟移蓼岸紅。別懷如迥野。長與水雲通。

題陳待制湖庄

園無三畝地。四面水連天。行向樓高處。却如身在船。野花春渚外。山色海雲邊。一任人來往。茲懷亦浩然。

寄陳西老

長日無吟伴。閑庭佇物華。竹枝斜帶雨。草色淨侵沙。風度平生友。隣居幾十家。前曾乘小醉。訪爾一甌茶。

初夏遊謝公巖

欲取紗衣換。天晴起細風。清陰花落後。長日鳥啼中。水國乘舟樂。巖扉有徑通。州人多到此。猶自憶髯公。

喜爽上人至

住與佛居近。僧閑稍問詩。湖山明月夜。風露菊花時。達意言常省。微吟步自遲。老來朋舊少。愛爾得相隨。

曉

詩鬢曉星星。霜天似水清。風當窻眼入。水向硯池生。已瘦梅花影。猶乾竹葉聲。夜來天地潔。惟是月華明。

題方上人房古梅房即故道書記所居

曾聽道公語。先師愛此梅。但知傳說老。不記若年栽。半樹枯仍發。疎花晚自開。方兄頭又白。常喜故人來。

春日游張提舉園池

西野芳菲路。春風正可尋。山城依曲渚。古渡入脩林。長日多飛絮。遊人愛綠陰。晚來歌吹起。惟覺畫堂深。

宿寺

古木山邊寺。深松逕底風。獨吟侵夜半。清坐雜禪中。殿淨燈光小。經殘磬韻空。不知清遠夢。啼鳥在林東。

孤坐呈客

晨起猶孤坐。餅泉待煮茶。寒煙添竹色。疎雪亂梅花。獨喜忘時事。誰知改歲華。多君能過此。入里似仙家。

送張主簿

上世喜同登。論交建水清。故人逢客裏。明日又離情。佳闕
東南少。卑官遠近行。秋風分手地。霜葉滿江城。

題石門洞

瀑水東南冠。廬山未足論。飛來長似雨。流處不知源。洞裏
龍爲宅。溪邊石作門。修行謝康樂。菴有故基存。

春望

樓上看春晚。煙分遠近村。曉晴千樹綠。新雨半池渾。柳密
鶯無影。泥新燕有痕。輕寒衫袖薄。杯酌更須溫。

題薛景石瓜廬

近舍新爲圃。澆鋤及晚涼。因看瓜蔓叶。識得道心長。隔沼
嘉蔬潔。侵畦異草香。小舟應買石。門外是漁鄉。

寄趙端行

庭深白無暑。苔徑復繁紅。賓客不長到。兒童亦可娛。荷花
時帶粉。蒲葉曉凝珠。與爾城闌隔。茲歡想不殊。

山居

柳竹藏花塢。茅茨接草池。開門驚燕子。汲水得魚兒。地僻
春猶靜。人閒日更遲。山禽啼忽住。飛起又相隨。

夏日懷詩友

流水堦除靜。孤眠得自由。月生林欲曉。雨過夜如秋。遠憶
荷花浦。誰吟杜若洲。良宵恐無夢。有夢卽俱遊。

臘日驪山渡逢故人

天寒多木葉。愁思滿溪濱。惆悵往來渡。經行多少人。時情
猶重臘。歲事每占春。與爾他鄉旅。誰當懷抱新。

次韻劉明遠移家二首

隱居須是僻。君向數家村。自以閑爲樂。何嫌貧尚存。碧波連草舍。白日掩柴門。挂得一瓢在。風來應惡喧。恬淡安身易。新家似舊居。逕涼行落葉。池淨數游魚。詩得唐人句。碑臨晉代書。半生惟此樂。同輩必無如。

登信州靈山閣跨鶴臺

清遊吾有分。渾似昔曾來。野屋憑高住。青山到水回。欲看靈岫遠。須待曉雲開。漸漸生愁思。鄉心上古臺。

題李商叟半村堂

住屋半依村。先生氣象尊。若非迎好客。長是掩柴門。覓句行山影。披簑釣月痕。固窮年八十。惟得令名存。

湘中

舊說湘中事。身來又可尋。廟存虞帝跡。江照楚臣心。爲客

人俱遠。題名刻自深。春迴洲渚綠。遙望正沈吟。

書翁卷詩集後

五字極難精。知君合有名。磨礪雙鬢改。收拾一編成。泉落秋巖深。花開野徑清。漸多來學者。體法似玄英。

微途寄翁靈舒

聞道長溪令。相留一館閑。便令全近舍。尚隔幾重山。爲旅春郊外。懷人夜雨間。年來疎覽鏡。怕見減朱顏。

大龍湫

瀑水數千尺。何曾貼石流。還疑衆山折。故使半空浮。霧雨初相亂。波濤忽自由。道場從建後。龍去任人遊。

送瑞州張知錄

歲暮不惜別。君行是宦遊。江西多野水。湖上正高秋。舊友

曾過處。新題必共留。官閑可尋訪。竹迳最深幽。

寄舍弟

寄問安寧弟。絃歌又一年。流來溪水遠。清到縣門前。故里人情樂。新居物色鮮。宜歸言語款。正及早梅邊。

秋夕懷趙師秀

冷落生愁思。衰懷得句稀。如何秋夜雨。不念故人歸。蛩響初尤靜。雲疎月尚微。惟憐離下葉。漸漸可相依。

登黃碧軒繼趙昌甫作

步陟高高寺。徐行不用扶。春天晴又雨。山色有還無。向向關中覓。茶因醉後呼。所懷論未足。何乃又征途。

溪上

十日清溪上。新春細雨天。綠波隨棹起。白鳥望舟眠。麥秀初如草。雲濃半是煙。却愁山路險。明日捨溪船。

梅坡

淺水低坡幾樹苔。冷光搖動玉塵埃。橫斜直似安排得。古怪多應折損來。潔白要須侵夜看。飄零却是被春催。閑來立斷清風影。一片飛香落酒杯。

秋日登玉峰

玉琢孤峰壓富沙。人行峰頂步雲霞。溪流緩去幾回曲。樹色幽分無數家。翠拂寒煙平似水。紅飄霜葉遠如花。明朝重向城中望。對北孤峰應不差。

壬戌二月

山城二月景如何。行處時時聽踏歌。淡色似黃楊葉小。濃香如蜜菜花多。春容每到晴時改。天氣偏從雨後和。好向

溪頭尋釣侶。小溪連夕漲清波。

題東山道院

古院嵌嵌石作層。綠苔芳草近郊坰。溪流偶到門前合。山色偏來竹裏青。靜與黃蜂通戶牖。閑將白鳥共沙汀。道人亦有能琴者。一曲清徽最可聽。

六月歸途

星明殘照數峰晴。夜靜惟聞水有聲。六月行人須早起。一天涼露濕衣輕。宦情每向途中滿。詩句多於馬上成。故里諸公應念我。稻花香裏計歸程。

訪湖友

城中日月望南湖。乞得閑來訪隱居。漸有秋霖籬菊長。纔無暑氣渚蓮疎。壁間古畫多賢像。案上塵編半佛書。未見主人逢稚子。不通姓字獨踟躇。

登滕王閣

重重樓閣倚江干。岸草汀煙遠近間。春水生時都是水。西山青外別無山。雲歸長若真人在。風過猶疑帝子還。自古舟船城下泊。幾人來此望鄉關。

贈趙師秀

薄宦歸來隔幾春。清羸還是舊時身。養成心性方能靜。化得妻兒不說貧。竹長新陰深似洞。梅添怪相老於人。亦知曾見高人了。近作文章氣力勻。

贈徐照

近叅圓覺境如何。月冷高空影在波。身健却緣餐飯少。詩清都爲飲茶多。塵居亦似山中靜。夜夢俱無世慮魔。昨日

曾知到門外。因隨鶴步踏青莎。

新春書事

出門閑步草萋萋。桑柘陰中亦有蹊。幾樹晴煙鶯囀早。一塘春水燕飛低。空如陶亮官爲令。難學嚴陵住近溪。聖世幸時沾薄祿。不能辛苦又攀躋。

泊馬公嶺

維舟拂曉步平沙。晚泊雲根第一家。新取菜蔬沽野露。旋編籬落帶山花。門前相對青峰小。屋後流來白水斜。可愛山翁無一事。藤墻西畔看蜂衙。

酒

才傾一盞碧澄澄。自是山妻手法成。不遣水多防味薄。要令麴少得香清。涼從荷葉風邊起。暖向梅花月裏生。世味總無如此味。深知此味卽淵明。

梅

是誰曾種白玻璃。夏絕寒荒一點奇。不厭壠頭千百樹。最憐窻下兩三枝。幽深真似離騷句。枯健猶如賈島詩。吟到月斜渾未已。蕭蕭鬢影有風吹。

過九嶺

斷崖橫路水潺潺。行到山根又上山。眼看別峰雲霧起。不知身也在雲間。

春雨

斷橋橫落淺沙邊。沙岸疎梅卧曉煙。新雨漲溪三尺水。漁翁來覓渡船錢。

柳着輕黃欲染衣。汀沙漠漠草菲菲。晚風吹斷寒煙碧。無

數鴛鴦溪上飛。

夏日閑坐

無數山蟬噪夕陽。高峰影裏坐陰涼。石邊偶看清泉滴。風過微聞松葉香。

丹青閣

翠靄空霏忽有無。筆端誰着此工夫。溪山本被人圖畫。却道溪山是畫圖。

移官南浦作

簿領初爲建水棲。移官南浦又沉迷。溪山轉處人煙隔。惟有黃鸝一樣啼。

秋行二首

憂憂秋蟬響似箏。聽蟬閑傍柳邊行。小溪清水不如鏡。一葉飛來細浪生。

紅葉枯梨一兩株。條然秋思滿山居。詩懷自歎多塵土。不似秋來木葉疎。

建劍道中

雲麓煙縈知幾層。一灣溪轉一灣清。行人只在清灣裏。盡日松聲雜水聲。

新涼

水滿田疇稻葉齊。日光穿樹曉煙低。黃鸝也愛新涼好。飛過青山影裏啼。

新春喜雨

農家不厭一冬晴。歲事春來漸有形。昨夜新雷催好雨。蔬畦麥隴最先青。

春晚

午風庭院綠成衣。春色方濃又欲歸。蝌蚪散邊荷葉出，
醖香裏柳綿飛。

漳州圓山

輕煙漠漠霧綿綿。野色籠青傍屋前。盡說漳南風水好，
衆山圍繞一山圓。

新秋

新秋一雨洗林關。晚色清澄滿望間。風靜白雲橫不斷，
山前又疊一重山。

五里牌邊

路繞山根石磴斜。小橋流水樹交加。柴門半掩人奚到，
五里牌邊三四家。

永春路

路行僻處山山好。春到晴時物物佳。秀色連雲原上麥，
清香夾道刺桐花。


秀峰寺

籃輿晚泊近巖隈。精舍門臨古道開。僧子相逢便相識，
十年三過秀峰來。

連江官湖

衆山圍繞衆團圓。官木參差古道邊。行盡濃陰今不了一，
湖飛雨帶輕煙。

黃公度字師憲。閩之莆田人。紹興八年進士第一。任簽書平海軍節度判官。代還除秘書省正字。秦檜以公度與趙丞相鼎善不悅。小人希檜意。論公度著私史以謗時政。罷歸。主管台州崇道觀。初公度赴朝。道過分水嶺。有詩云。嗚咽泉流萬仞峰。斷腸從此各西東。誰知不作多時別。依舊相逢滄海中。及公度歸莆。趙丞相先已謫潮陽。小人傳會其說。謂此詩指趙而言。將不久偕還中都也。檜益怒。以惡地處之。通判肇慶府事。攝守南恩。檜死。召除尚書考功員外郎。無何疾卒。林大鼐誌其墓。謂詩效杜甫古律格。句法逼真。洪邁謂精澁而不浮。於巧平澹而不近俗。其悲秋句不知謫僊少陵以還。大曆十



才子尚能窺其藩。否要皆過情。唯陳俊卿謂雖未盡追古作。要自成一家。其言爲差近云。

正月晦日寄宋永兄

萬事縈心空歲月。一分春色已塵埃。簷間雨脚何時斷。陌上遨頭幾日來。寒東幽花如有待。風延啼鳥苦相催。明年此會各南北。趁取官閒共酒杯。

春日懷王慶長

夜雨纔霑地。朝暉已照牆。潤畦舒菜甲。暖樹拆茶槍。潛沙積關河。息戰塲。王孫綠底事。萍迹久他鄉。

悲秋

萬里西風入晚扉。高齋悵望獨移時。迢迢別浦帆雙去。漠漠平蕪天四垂。雨意欲晴山鳥樂。寒聲初到井梧知。丈夫

感慨關時事。不學楚人兒女悲。

送鄭察推叔友罷官之湖陽二首

官達身何補。才名陸未沉。不妨吾道在。休較吏文深。城郭春將暮。風雲晚更陰。相看炎海闊。魂斷欲分襟。

春草故人去。落花離緒多。芙蓉少顏色。薏苡盡風波。塵土非長策。功名一醉歌。周南暫留滯。莫改歲寒柯。

陳晉江以壬戌四月上澣宴同僚于二公亭

百年遺址俯郊坰。十里蒼波帶古亭。隔岸樓臺春去遠。雨湖烟雨酒微醒。苔碑缺落庭松老。野鳥去來汀草青。風物不殊天竺路。扁舟髣髴舊曾經。

秋旱熱甚尤苦登陟輿中戲成

少皞不用事。八月猶苦熱。南方本炎蒸。况乃甘澤闕。雨師

弛厥職。旱魃逞餘孽。金石鑠欲流。汗池龜甲裂。稼穡亦已
休。田家生理絕。敢意築場圃。漸聞罌瓶竭。租歛數有恒。不
爲愆陽輟。州縣急鎔銖。鞭箠動流血。吁嗟號帝關。此語何
由徹。空村巫覡舞。靈祠香火謁。水旱制於天。祈禳恐虛設。
嘗聞桑林禱。爪犧亦清潔。萬國幾爲魚。堯德豈其劣。但令
備先具。難必珍氣滅。江淮十萬兵。仰口資飽轍。太倉無宿
儲。有司憂百結。腐儒從薄宦。監與走喘噪。王事有嚴程。亭
午不得歇。林鳥呀無聲。僕夫屢告竭。焉得變玄冬。陰厓踏
層雪。

惜別行送林梅卿大鼎赴關

刺桐城邊桐葉飛。刺桐城外行人稀。客來別我有所適。問
客此去何當歸。林卿妙齡才秀發。胸中萬卷涵溟渤。家聲
合沓蓋九州。里第嶙峋表雙闕。場來試吏天南方。驥繫焉
能騁所長。梅僊脫身東市卒。杜老筆中書堂傳道淮壩
減豺虎。政須禮樂事明主。之子軒軒霄漢姿。好向春風刷
毛羽。

還家

黎明呼羸僮。拄策渡野水。輕嵐翳初日。古道步平砥。麥隴
黃四出。松竹翠相倚。人間春告盡。巖色秀未已。眼入故鄉
明。語還親舊喜。印非朱買臣。金無蘇季子。竊笑免妻孥。相
過動隣里。富貴豈吾謀。薄游聊爾耳。

暮春宴東園方良翰喜有詩入夏追和

要洗襟懷萬斛埃。一尊相屬莫遲回。顛狂柳絮將春去。排
比荷花刺水開。懶矣宦情甘冗長。拙於句法強追陪。人生

行樂須閒健。千古朱顏同一顏。

道間卽事

花枝已盡鶯將老。桑葉漸稀蠶欲眠。半濕半晴梅雨道。乍寒乍暖麥秋天。村墟沽酒誰能擇。郵壁題詩盡偶然。方寸怡怡無一事。簾裘糲食地行僊。

白沙夜聞灘聲

錯認松風萬壑傳。又如急雨碎池蓮。青燈孤館元無寐。况復溪聲到枕邊。

和泉上人

芒鞋踏遍萬山松。得得歸來丈室中。破衲一身在懸磬。清談對客似撞鐘。名家要看驚人舉。覓句何須效我窮。春雨地爐分半坐。便疑身住古禪叢。

題白沙鋪

負郭可無三頃秫。蓋頭幸有兩間茅。還鄉且盡田家樂。舉世誰非市道交。村酒一杯澆磊塊。山程數驛更燒熬。羸驂莫怪歸鞭急。心在輕紅荔子梢。

送陳應求赴官

莫辭酒且聽歌。休被驪駒白玉珂。主人勸客終今夕。明日長亭可奈何。金風蕭蕭塵餘熱。砌蟲唧唧助淒切。此時景物不勝愁。况是離人心欲折。陳侯陳侯貌巖巖。而俊整才浩浩而清絕。有如壺山之萬仞。噴噴壽水之千尋。瑩澈青芝赤箭藥籠儲。金鐘大鏞廊廟須。天生奇才爲時出。容易棄擲天南隅。君不見馬賓王新豐一逆旅。又不見公孫弘菑川一老儒。逢辰立談取卿相。至今文采照天衢。廣文官

舍雖落莫。刀筆不與俗吏俱。公餘更勤五車讀。未必不是
北門西掖之權輿。刺桐古城花欲燃。舊遊人物想依然。憑
君到彼訪二陸。向道故人飽飯度殘年。

送弟童士季赴永春

贈君以宣城秋兔之穎。佩君以嶧山焦尾之琴。餞君以顯
父清壺之酒。送君以安仁金谷之吟。筆傳洙泗之正印。琴
彈單父之遺音。酒以陶百里醇釀之化。詩以寫一時離別
之心。門前車馬氣駸駸。黃葉飛翻秋正深。風雨對床連夜
語。江山異地欲分襟。憶昔聯名唱行殿。一日聲華九垓遍。
自知無用甘林泉。君亦何爲尚州縣。君今未用歎滯留。丈
夫勲業要晚收。信臣千載循吏傳。寧令當年褒德侯。高才
所莅無全牛。民自不寬吏早休。備魚誅求急星火。行看寇

盜盡金糧

西郊步武地春將老矣。不能一往朝吉妣。今日爲邀

頭。澍雨大作非惟人心難并止。或尼之枕上得小

詩。資宋永兄一噓。因呈昔遊兄弟。速尋舊盟。勿爲

天公所玩。

無復西郊訪綺羅。任教佳景去如梭。殘杯冷炙何曾夢。亂
絮飛花積漸多。舉世盡從忙裏過。幾人能共醉時歌。不辭
作意營春事。急雨狂風可奈何。

唱和盈軸而燕集未期。小詩請廣文兄爲遨頭。

煩君管領東君手。收拾風光尊俎中。與作遨頭共春燕。何
須擁鼻學秋蟲。誰憐老子興不淺。自笑窮人詩轉工。趁取
身閒酒價賤。明年此日又西東。

宋永兄一訪青帝而黃髮作惡累日戲作小詩問安
鳴鐘伐鼓南山阿。傾城車馬相憂摩。萬缸高下照朱碧。百
堵往來紛綺羅。身入醉鄉顏紅玉。月明歸路湛金波。挽君
一出卧三日。奈此陌上春光何。

贈泉守趙表之令於

扁舟昔耀浙江邊。曾醉王孫玳瑁筵。竹杖芒鞋晚城上。金
荷銀燭夜堂前。宦遊我輩聊復爾。聚散人間亦偶然。誰料
天涯今八載。青燈相對各華顛。

春日宴其樂臺

畫棟朱甍插紫清。連山帶水自紆紉。紫閣閣高下魚鱗比。田
畝縱橫碁局平。花發鳥啼春耐事。夜闌客散月多情。寸陰
自古千金重。一笑人間萬慮輕。

題瘦牛嶺

自笑年來為食謀。扶攜百指過南州。時平四野皆青草。此
地何曾解瘦牛。

謝傅叅議彥濟惠筴用山谷韻

北方九月霜。賓盤無生菜。嶺南信地暖。窮冬竹萌賣。君念
庾郎貧。蠶粟供庖宰。中有歲寒姿。真時久不壞。前身涓川
侯。千畝償宿債。珠可配天花。賤不數石芥。早薤與晚菘。奴
僕望賓介。文園酒渴餘。想不厭姑囁。預恐吹作竹。明日東
風噫。急須驅兒童。傾筐攜采采。

題潮陽石塔寺

投檄真成出瘴鄉。籃輿漸喜到僧坊。長風解事吹江雨。乞
與行人五月涼。

題師吳堂

夫子賢堯舜。老彭嘗竊比。郊子及師襄。下問曾不耻。河汾一書生。自謂聖復起。西京投閣士。敢與孟軻齒。古人取名廉。後人取名侈。誰知今人中。復見古君子。方君帥南越。千載少倫擬。燕居榜師吳。一謙具四美。隱之經石門。得名一杯水。伯始萬事優。可但清而已。官曹服公德。廉仁革貪鄙。民俗陶公化。淳厚勝姦究。蠻獠畏公威。折箠制千里。老猾憚公明。束手敢干紀。三城有餘力。一堂仍舊址。裘帶自清閒。賓僚多燕喜。惟昔開元相。勲業照青史。胸蟠活國計。試手曾向此。我公廊廟具。勞外亦久矣。尺一趣歸裝。高蹈廣平軌。

西園招陳彥昭同飲

稻粱未飽且紛紛。鴻鵠低徊雞鶩羣。萬里歸心闕嶠片。十年旅夢漳溪雲。隣諳好事頻賒酒。家不全貧肯賣文。未用天涯歎離索。一尊滿意說桑榆。

秋城晚望

斷續悲笳起麗譙。冥冥晚色四山椒。隔江人散虛分米。十里津喧蚤趁潮。夕照含山心悄悄。西風動地鬢飄蕭。低頭自笑微官縛。東望滄溟歸路遙。

恩平燈夕憶上都舊遊呈座客

千尺鰲山面紫宸。豪華曾見夾城春。至今魂夢釣天奏。投老宦遊窮海濱。隨分尊壘奉佳客。記時燈火照嚴闈。年來大覺歡情減。聊與風光作主人。

乙亥歲除漁梁村

年來似覺道途熟。老去空更歲月頻。爆竹一聲鄉夢破。殘燈永夜客愁新。雲容山意商量雪。柳眼桃腮領畧春。想得在家小兒女。地爐相對說行人。

後村詩鈔

劉克莊字潛夫。莆陽人。後村其號。學於真西山。以廢入仕。除湖倅。遷建陽令。移仙都。嘗詠落梅。有東君謬掌花權柄。却忌孤高不主張。讒者箋其詩。以示柄臣。由此閑廢十載。因有病後訪梅絕句云。夢得因桃却左遷。長源爲柳忤當權。幸然不識桃并柳。也被梅花累十年。後起至將作簿兼叅議。端平初爲玉牒所主簿。奉祠起知袁州。累遷廣東運判。又奉祠起江東提刑。召對以將作監直華文閣。賜同進士出身。專史事。尋入經筵。直綸省。無何以留。黃不奉詔用秘閣。修撰出爲福建提刑。初趙紫芝徐道暉諸人擺落。近世詩律斂情約性。因狹出奇。合於唐人。時謂四靈體格。後村年甚少。刻琢精麗。與之並

驅已而厭之謂諸人極力馳驟纔望見賈島姚合之藩
而已欲息唐律專造古體趙南塘曰不然言意深淺存
人骨懷不繫體格若氣象廣大雖唐律不害爲黃鍾大
呂否則手操雲和而驚颺駭電猶隱絃撥間也後村
感其言而止然自是息益新句愈工涉歷老練布置濶
遠論者謂江西苦於麗而冗莆陽得其法而能瘦能淡
能不拘對又能變化而活動蓋雖會衆作而自爲一宗
者也

宿莊家

茆茨迷詰曲。度谷復踰陂。世上事如許。山中人不知。牛羊
晴卧野。鵝鷺晚歸池。粗識爲農意。秋輸每及時。

北山作

骨法枯閒甚。惟堪作隱君。山行忘路脉。野坐認天文。字瘦
偏題石。詩寒半說雲。近來仍喜曠。閒事不曾聞。

黃檗山

出縣半程遙。松間認粉標。峰排神女峽。寺創德宗朝。鶴老
巢高木。僧寒曬墮樵。早知人世淡。來住退居寮。

客中作

漂泊何須遠。離鄉卽旅人。吹薪嘗海品。書刺謁田鄰。家寄
寒衣少。山來曉夢頻。小兒仍病瘧。詩句竟無神。

小寺

小寺無蹊徑。行時認薛痕。犬寒鳴似豹。僧老瘦于猿。澗水
來旋磨。山童出閉門。城中梅未見。已有數株繁。

晚春

後村詩集 二
花事匆匆了。人家割麥初。雨多田有鵲。潮小市無魚。秃筆
回僧簡。褰衣看古書。經年稀見客。磬折轉生疎。

夜過瑞香菴作

夜深捫絕頂。童子旋開扉。問客來何暮。云僧去未歸。山空
聞瀑瀉。林黑見螢飛。此境惟予愛。他人到想稀。

蒜嶺

到此思家切。寒衣半淚痕。燒餘山頂禿。潮至海波渾。僕怕
昏無店。人言近有村。吾生輸野老。笑語掩柴門。

浦城道中

纔入僊霞路。重裘尚不支。居人收相實。客子辦梅詩。地濕
然其坐。霜寒隔被知。向來真錯計。不買草堂基。

幽居寺

相傳有儒者。唐季隱茲峰。電已收遺藁。雲方鎖暮鐘。木碑
無世次。石洞斷人蹤。此士何曾死。林深不可逢。

哭容倅舅氏二首

老赴容州辟。移書勸不回。客迎蕭寺哭。喪附海舟來。瘴雨
銘旌暗。空山梵磬哀。未知墳上柏。此去幾時栽。
尚記陪言笑。如今叫不應。兒分身後俸。僧上殯前燈。宅有
遺基在。田無一畝增。問天何至此。在日以廉稱。

吳大帝廟

露坐空山裏。英靈喚不起。久無祠祭至。曾作帝王來。壞壁
蟲傷畫。殘爐鼠印灰。今人渾忘却。江左是誰開。

鐵塔寺

細認苔間字。方知鑄塔時。不因兵廢壞。似有物扶持。古殿

人開少溪窗日上。遲僧言明受事。相對各攢眉。

哭薛子舒二首

鑿自金壇至。猶言疾可爲。瀕危人未信。聞死世皆疑。交共收殘藁。妻能讀殮儀。借來書冊子。掩淚付孤兒。忍死教磨墨。留書訣父兄。讀來堪下淚。寄去怕傷情。墓要師爲誌。詩於世有名。夜闌秋枕上。猶夢共山行。

贈川郭

川郭顛狂甚。平生挾術遊。老猶攜侍女。貧不諂公侯。用藥多投病。訓錢或掉頭。金陵官酒貴。應典舊貂裘。

贈錢道人

除了布裘外。都無物自隨。既能行大雪。飢但噉華池。說相言多驗。嫌錢事更奇。一般難曉處。裝背貴人詩。

送鄒景仁

衝寒何處去。新戍尚來年。客勸休辭幕。君言已買船。霜清江有蟹。藥脫木無罨。若過東林寺。攜家往問禪。

二將

石侯韓佐。自將交。人曾哭。來。二將同時死。路人聞亦哀。力窮塵轉急。圍厚突難開。戰骨尋應在。殘兵間有迴。傷心郵遞裏。隔日捷書來。

蒜嶺夜行

嶺頭無復一人來。漁店收燈戶不開。松氣滿山涼似雨。海聲中夜近如雷。擬披醉髮橫簫去。只寄鄉書與劍迴。他日有人傳肘後。尚堪收拾作詩材。

別敬器之

舊說閩人苦節稀。先生獨抱歲寒姿。老年絳帳聊開講。當

日烏臺要勘詩。東閣不遊緣有氣。草堂未架爲無費。輕煙
小雪孤行路。折牘梅花寄一枝。

哭楊吏部通老

白首除郎已晚哉。民間桑柘手親栽。蓋棺只着淡衣去。行
李空擔語錄迴。主祭遺孤猶未冠。著書殘藁漫成灰。可憐
薄命飄飄客。虛事江西莫府來。

老歎

肘後奇書懶更開。只今年鬢已相催。但聞方士騰空去。不
見童男入海迴。無藥能留炎帝在。有人曾哭老聃來。醉鄉
一路差堪向。終擬劉伶冢畔埋。

答友生

讀易參禪事事奇。高情已恨挂冠遲。清于楚客滋蘭日。貧
似唐人乞米時。家爲買琴添舊債。困因養鶴減晨炊。君看
江表英雄傳。何似孤山一卷詩。

趙清獻墓

南渡先賢迹已稀。蕭然華表立山陲。可曾長吏修祠宇。便
恐樵人落樹枝。幾度過墳偏下馬。向來出蜀只攜龜。自憐
日暮天寒客。不到林間讀隧碑。

呈袁秘監

近日頻聞有峻除。人傳君相重師儒。細旃坐穩方輪講。羣
玉峰高未要扶。別後曾過東閣否。新來亦乞鑑湖無。幾時
供帳都門外。真寫先生作畫圖。

漁梁

春泥滑滑雨絲絲。一路陰寒少霽時。水入陂渠喧似瀑。雲

從山崦上如炊。療衣去傍田家火。多獨來看野店詩。落盡
梅花心事惡。獨搔蓬鬢遶殘枝。

小梓人家

生來拙性嗜清幽。因過山家爲小留。頂笠見歸行樹杪。提
瓶婦去汲溪頭。參天老竹當門碧。盡日寒泉遶舍流。我料
草堂猶未架。規模已被野人偷。

瓜洲城

先朝築此要防邊。不遣見戰船。遮斷難傳河朔檄。修
來大費水衡錢。書生空抱聞鷄志。故老能言飲馬年。慚愧
戍兵身手健。酒樓各占一間眠。

鳳凰臺晚眺

經月疎行臺上路。林麓城郭忽秋風。馬嘶衛霍空營裏。螢

起齊梁廢苑中。野寺舊曾開玉帳。翠華久不幸離宮。小儒
記得隆興事。閒對山僧說魏公。

贈玉隆劉道士

觀中曾訪老黃冠。爾尚爲童立醮壇。新染氎衣披得稱。舊
泥丹竈出來寒。詩非易作須勤讀。琴亦難精莫廢彈。憶上
洪崖題瀑布。因游試爲拂塵看。

晉元帝廟

元帝新祠西郭外。野人弔古獨來游。陰陰畫壁開冠劍。寂
寂絲窠上線旒。勢比龍盤猶在眼。事隨鴻去不回頭。葉碑
廊下無人看。欲去摩挲又少留。

清涼寺

塔廟當年甲一方。千層金碧萬緇郎。開山佛已成。鬼住

院僧猶說李王遺像有塵龕壞壁斷碑無首立斜陽惟應
駐馬坡頭月曾見金輿夜納涼

冶城

斷鏃遺鎗不可求西風古意滿原頭孫劉數子如春夢王
謝千年有舊遊高塔不知何代作暮笳似說昔人愁神州
只在闌干北度度來時怕上樓

雨花臺

昔日講師何處在高樓猶以雨華名有時寶向泥尋得二
片山無草敢生落日磬殘鄰寺閉晴天牛上廢陵耕登臨
不用深懷古君看鍾山幾箇爭

新亭

此是晉人遊集處當時風景與今同不干鐵鑊樓船力似
是蒲葵塵柄功幾簇旌旗秋色裏百年陵闕淚痕中興亡
畢竟緣何事專罪清談恐未公

真州北山

憶昔入控弦官軍迎戰北山邊笳簫有主安新葬蓑
笠無人墾廢田兵散荒營吹戍笛僧從敗屋起茶煙遙憐
鍾阜諸峰好閑鎖行宮九十年

故宅

恰則炎炎未百年今看枯柳着疎蟬莊田置後頻移主書
畫殘來亦賣錢春日有花開廢圃歲時無酒滴荒阡朱門
從古多如此想見魂歸也愴然

送周監門

一領青衫似敗荷奈君母老秩卑何三年幕府無人薦當

後村詩金
日柴門有客過。身畔擔輕藏俸少。江頭船重載書多。故人若問軍中事。爲說防秋夜枕戈。

挽黃巖趙郎中二首

朱公徒弟丘公壻。標致雖高氣宇和。心向奏篇尤暴白。髮因時事欲蒼皤。訃傳淮甸邊情惜。路出蕭山巷祭多。最長郎君師友盛。我知墓碣有人磨。

青衫昔作督郵時。賞鑒除公更有誰。勘獄不嫌人守法。撰文常對衆稱奇。築臺虛辱生前意。穿冢難酬地下知。欲寫哀思傳挽者。身今戎服不能詩。

寄趙昌父

世上久無遺逸禮。此翁白首不彈冠。一生官職監南嶽。四海詩盟主玉山。經歲著書人少見。有時入郭俗爭看。何因樵服供薪水。得附高名野史間。

豫章溝

溝水泠泠草樹香。獨穿支徑入垂楊。齊花滿地無人見。唯有山蜂度短墻。

野店蕭蕭掩竹門。岸沙猶記履綦痕。東風枉是吹花急。綠盡平蕪却斷魂。

西山

絕頂遙知有隱君。食芝種木鹿爲羣。多應午竈茶煙起。山下看來是白雲。

秋風

黃葉蕭蕭忽滿街。獨騎瘦馬豫章臺。莫將宋玉心中事。吹向潘郎髣髴來。

跋小寺舊題

禪几曾陪白氎巾。柑花似雪鬪芳新。而今柑子圓如彈。不見澆花供佛人。

憶殤女

靈照驕魂章水西。冷風殘雪古招提。老懷已作空花看。更把楞嚴曉病妻。

歸至武陽渡作

夾岸盲風掃棟花。高城已近被雲遮。遮時畱取城西塔。篷底歸人要認家。

古墓

石麟關耳筍生苔。要讀豐碑與客來。精舍荒涼僧已出。瓦墻一朵佛桑開。

下蜀驛

嗔殿荒涼屋欠扶。紹興遺老故應無。舊來曾識高皇帝。尚有庭前柳一株。

出郭

江邊一雨洗秋容。北郭東郊野意濃。老大怕它人檢點。隔溪隔柳看芙蓉。

再贈錢道人

拙貌慚君仔細看。鏡中我自覺神寒。直從杜甫編排起。幾箇吟人作大官。

蒙恩監南嶽廟

久問嫖姚乞退閒。今朝準勅放生還。人欺解罷青油幕。帝遣監臨紫蓋山。營卒展辭回玉帳。林僧講賀到柴關。丈夫

不辦封侯事。猶要名標處士間。

烏石山

見時逃學類來此。一二重尋盡有蹤。因漉戲魚羣下水。緣敲響石鬪登峰。熟知舊事惟隣叟。催去韶華是暮鐘。畢竟世間何物壽。寺前雷仆百年松。

葺居

兵火間關髻欲絲。歸來聊卜草堂基。架留手澤書堪看。幾有躬耕米可炊。畏濕先開通水竇。貪明稍斫近簷枝。旋移梅樹臨窗下。準備花時要索詩。

挽趙仲白二首

生被才名譴。摧殘到死休。家留遺藁在。棺問故人求。對月悲孤詠。逢山憶共遊。昔年攜手地。今送入松楸。

昨吊寢門外。萊妻泣最悲。因言兒上學。復爲墓求碑。零落燒丹訣。淒涼哭鶴詩。託孤朋友事。非謂九泉知。

除夕二首

除夕陰寒怕卷簾。雨聲斷續下疎簷。壁穿自和乾泥補。窗損教尋廢紙粘。紙有青燈相守定。縱無白髮亦生添。更殘自算明年事。不就君平卦肆占。

挽鄭叔人

李尚書內

憶在軍中爲記室。謝公門館事皆知。謙卑若婦初嬪日。儉素猶夫未貴時。病了死生惟點首。晚憂家國每顰眉。舊人猶有任安在。攬涕西風獻些詞。

悼阿昇

寶惜吾兒如拱璧。那知變滅只須臾。喪啼尚宿通宵火。塗

頤猶殘隔日朱。坐客相寬云夢幻。故人來弔訝清癯。荒山
歲晚無行跡。心折原頭樹影孤。

送真舍人帥江西三首

諫書元不爲求名。上有穹蒼鑒至誠。素傳觀皆動色。豈
知難悟漢公卿。
船客珠犀湊郡城。向來黠苑幾名卿。海神亦歎公清德。少
見孤舟箇樣輕。
應對談諧路亦開。漢家天子日招徠。當時惟有膠西相不
向平津閣裏來。

立春二首

恰歸舊隱再逢春。村巷荒涼草沒人。天壤園中門作竇。盜
規墳上樹爲薪。官如巫祝難羞賤。家似樵漁敢諱貧。聞說
鄰醅低價賣。病夫一滴未沾唇。

今歲春盤始住家。也勝羈旅走天涯。圃晴菜拆經霜甲。林
暖梅飛徧地花。閑有工夫憂世事。老無勳業惜年華。近來
死盡吟詩者。得句聊從野叟誇。

燈夕

千炬金樞映玉蕖。臺城昨夢又年餘。斷無絃索鳴華屋。惟
見炊煙起草廬。兒報瓶空因止酒。婢言油盡暫停書。蓬窗
亦有精勤士。何必然藜向石渠。

戲孫季蕃

少日逢春一味癡。輕鞭小袖趁芳時。常過茶邸租船出。或
在禪林借枕歌。名妓難呼多占定。好花易落况開遲。身今
憔悴投空谷。悔不當年秉燭嬉。

紫澤觀

修持盡是女黃冠。自小辭家學住山。簾影靜垂斜日裏。磬聲徐出落花間。祭星綠簡親書字。避客青衣密掩關。最愛粉牆堪試筆。苦無才思又空還。

方寺丞新第二首

宅成天下借圖看。始笑書生眼力慳。地占百弓多是水。樓無一面不當山。荷蕒似入茗溪路。石怪疑行雁蕩間。只恐中原方鼎沸。天心未遣主人閒。一生不畜買田錢。華屋何心亦偶然。客至多逢僧在坐。釣歸惟許鶴隨船。按行花木皆僚友。主掌湖山即事權。京洛貴人金谷裏。安知世上有林泉。

方寺丞艇子初成

船成莫厭野人過。久欲從公具釣蓑。積雨晴來湖面濶。殘花落盡樹陰多。新營小店皆依柳。舊有危亭尚隔荷。所恨前峰含暝色。不然和月宿煙波。

問友人病

病來清瘦欲通仙。淡炷香篝掃地眠。野客勸尋廉藥買。外人偷出近詩傳。術庸難靠醫求效。俗陋多依鬼乞憐。鷗鷺如欺行迹少。分明溪上占漁船。

偶賦

身已深藏畏俗知。客來鄰曲善爲辭。偶彈冠起成何事。徑拂衣歸自一奇。村飲婦常留燭待。山行童亦挾書隨。明時性學尤通顯。却悔從初業小詩。

贈翁定

相逢乍似生朋友。坐久方驚。隔澗餘。徧問諸郎皆冠帶。自言別業可樵漁。住鄰秦系曾居里。老讀文公所著書。十七年間如電瞥。君鬚我鬢兩蕭疎。

哭毛易甫

至尊殿上主文衡。誰料臺中有異評。垂二十年猶入幙。後三四榜盡登瀛。白頭親痛終天訣。丹穴雛方隔歲生。策比諸儒無愧色。自緣命不到公卿。

題方武成詩草

性僻愛詩如至寶。借君詩卷百迴看。吟來體犯諸家少。改定人移一字難。東瀑爲題猶天矯。吞山入句尚蒼寒。嗟余老鈍資磨琢。安得同衾語夜闌。

挽柯東海

不持寸鐵霸斯文。疇昔曾將膽許君。撰出騷詞如宋玉。寫成帖字婢羊欣。喪無歸費人爭賻。詩有高名亦聞昨。覽理銘增感愴。纍纍舊友去爲墳。

書考一首

香火精勤閱一替。孤臣無路答鴻私。銜如已廢陳人樣。俸比初開小學時。世上升沉姑付酒。考中供狀是吟詩。五錢買得羊毛筆。自寫年勞送有司。

穴蟻

穴蟻能防患。常于未雨移。聚如營洛日。散似去郊時。斷續緣高壁。周遭避淺池。誰爲謀國者。見事反傷遲。

宿千歲庵聽泉

因愛庵前一脉泉。襍衾來此借房眠。驟聞將謂溪當戶。久

聽翻疑屋是船。變作怒聲猶壯偉。滴成細點更清圓。君看
昔日蘭亭帖。亦把湍流替管絃。

哭宋君輔

倚

早題淡墨魁多士。晚着青衫事護軍。方見叔孫來議禮。已
傳子夏去修文。先朝繅藉爲圭壁。近世摧殘用斧斤。回首
冶城棋飲地。雁淒蟬咽不堪聞。

觀元祐黨籍碑

嶺外瘴魂多不返。冢中枯骨亦加刑。稍寬末後因奎宿。暫
仆中間得彗星。蚤日大程知反覆。莫年小范要調停。書生
幾點殘碑淚。一弔諸賢地下靈。

答翁定

牢落祠官冷似秋。賴詩消遣一襟愁。喜延明月常開戶。食
對青山懶下樓。客詫瀑奇邀往看。僧誇寺僻約來遊。何當
與子分峰隱。飢嗅巖花渴飲流。

聞城中募兵有感二首

調發年多籍半空。虎符招補至關中。莊農戎服來操戟。太
守儒裝學拍弓。去日初辭鄉樹綠。到時愁見戍旗紅。募金
莫作纏頭費。留製衣袍禦北風。

昔在軍中日募兵。萬夫魚貫列行營。懸金都市招徠廣。立
的轅門去取精。二石開弓猶恨少。雙重被鎧尚嫌輕。伍符
今屬他人手。歷歷空能記姓名。

書事二首

黃旗旁午責軍需。括匠搜船遍里閭。士稚去時無鎧仗。武
侯屯處有儲胥。粟空都內憂難繼。甲出民間策恐疎。昔補

戎行令簡汰。空搔短髮看兵書。
人道山東入職方。書生膽小慮空長。遺民似蟻飢難給。俠
士如鷹飽易揚。未見馳車修寢廟。先聞鑄印拜侯王。青齊
父老應流涕。何日鸞旗駐路旁。

李文饒一首

畫取維州如槁葉。策禽路將似嬰兒。九原精爽人猶畏。想
見中書秉筆時。

送葉知郡

家在春風住二年。借侯無路意悽然。到來不飲官中水。歸
去難謀郭外田。燈遠村民多點塔。擔輕津吏易排船。壺公
亦似追程送。青過囊山古寺前。

身在一首

身在樵村釣瀨行。秋毫。不與市朝爭。目云嗜酒相繩急。謫
到吟詩所犯輕。沉水一鉢銷。永晝蠹書數葉伴。殘更閉門
孤學無窮味。笑殺韓公接後生。

命拙

命拙躬耕逢歉歲。旋營水菽度晨昏。晴天田舍禾歸窖。臘
日山家酒滿盆。護竹短墻修復壞。澆花小井汲來渾。早知
不是封侯相。蓑笠何因肯出村。

歲晚書事十首

荒苔野蔓上籬笆。客至多疑不在家。病眼看人殊草草。隔
林迢遞見梅花。
踏破儂家一徑苔。雙魚去換隻雞回。幸然不識聲牙字。省
得閑人載酒來。

書生元不信禳祥。老去無端慮事詳。白髮社巫云日吉。明
朝漂井更苦牆。

鬱壘鍾馗尚改更。青雲變幻幾公卿。人間止有章泉叟。撲
斷蘄山了一生。

細君炊秫婢縲絲。綵勝酥花攄不知。窗下老儒衣露肘。挑
燈自撥一年詩。

門冷如水儘不妨。由來富貴屬蒼蒼。誰能却學癡兒女。淡
夜潛燒祭竈香。

歲晚郊居苦寂寥。日高關路去城遙。淡淡榕逕苔牆裏。忽
有銀釵叫賣樵。

主公晚節治家寬。婢憎奴驕號令難。圍在屋邊慵種菜。井
欄砌畔怕澆蘭。

日日抄書懶出門。小窗弄筆到黃昏。了頭娘子忙勻粉。不
管先生硯水渾。

丐客鶉衣立戶前。豈知儂自窘殘年。染人酒媪逋猶緩。且
送添丁上學錢。

元日

元日家童催蚤起。起搔冷髮替殘眠。未將柏葉簪新歲。且
與梅花釵隔年。甥姪拜多。次親朋來少。人生
智力難求處。惟有稱觴阿母前。

野性

野性無羈束。人間毀譽輕。客言詩惹謗。妻諫酒傷生。窗納
鄰峰碧。瓢分遠澗清。近來尤少睡。打坐到鐘聲。

懷保寧聰老

秣陵一見歎魁梧。每恨斯人不業儒。幾度劇談俱抵掌。有時大醉勸留鬚。探梅尚憶陪山屐。煨芋何因共地爐。我已休官師退院。官來林下草庵無。

夾深草堂

嶺絕瀑源窮。曾于此築宮。得知千載上。因住萬山中。故址苔荒盡。遺書電取空。高臺南渡始。却議及招弓。

西林寺

將謂如廬阜。因迂數里行。問俱無古迹。來等慕虛名。借榻眠難熟。逢碑眼暫明。殘僧逃似鼠。難結社中盟。

仙遊縣

不見層岡與複嶂。眼中夷曠似江南。煙收綠野連青嶂。樹闕朱橋映碧潭。丞相無家曾住寺。聘君有字尚留庵。荒山數畝如堪買。徑欲誅茅老一龕。

自昔

自昔英豪忌苟同。此身易盡學難窮。習為聯絕真唐體。講到玄虛有晉風。蠲子盡云參妙喜。乞兒自許識荆公安。知斯世無顏閤。到死浮沉里巷中。

耕仕一首

耕不逢年仕背時。蕭然井臼揄蒹茨。貧求生墓為謀早。病學還丹見事遲。馬上功名成畫餅。林間身世似持箕。未應對客呈飢面。尚有荒園可種葵。

感昔二首

談攻說守漫多端。誰把先朝事細看。棄夏西郵忘險要。失燕北面受風寒。傷無公議扶神李。中有流言沮范韓。寄語

淡衣揮麈者。身經目擊始知難。
先皇立國用文儒。奇士多爲筆墨拘。檀水歸來邊奏少。熙
河捷外戰功無。生前上亦知強至。死後人方誅尹洙。螻蟻
小臣孤憤意。夜窗和淚看輿圖。

燕

野老柴門日日開。且無權檻礙飛颺。勸君莫入珠簾去。羯
鼓如雷打出來。

過永福精舍。有懷仲白二首

永福招提小步廊。憶攜詩卷共追涼。年來行處常迂路。纔
近君家卽斷腸。

一樹梅花換舊居。主人僭去客來疎。白頭留得吟詩友。每
見郎君勉讀書。

春早二首

一春閉雨動龍顏。曉殿權停賀雪班。林下散人看邸報也。
疎把酒廢游山。

去冬玉塞靜無埃。春雪雖遲亦壓天。火土送歸天竺去。相
公先入浙江來。

屋山無筍圃無蔬。釜冷樽空客至疎。說與厨人稀作粥。老
夫留腹要盛書。

清明未雨下秧難。小麥低低似剪殘。窮巷蕭然惟飲水。家
童忽報井源乾。

得曾景建書一首

聞君別後買傾城。酒戒中年亦放行。遠使忽來知病起。近
書全未說丹成。莫嫌身去依劉表。曾有人甘殺福衡。何日

斷原荒潤畔。一間茅屋對寒檠。

示兒

瓜芋村邊一畝宮。閉門不復問窮通。生羞奏技伶人裏。死怕標名狎客中。講學有誰明太極。吟詩無路到薰風。身今老矣空追悔。但祝吾兒勿似翁。

憶毛易甫薛子舒

昔在江東會集時。二君獨許話心期。春風蕭寺同登塔。落日荒臺共讀碑。百吏染毫供草檄。萬花圍席看題詩。那知數尺無情土。別後雙埋玉樹枝。

哭趙紫芝

奮到詩人處。詞林亦可悲。世間空有字。天下更無詩。盡出香分妓。惟留硯付兒。傷心湖上冢。誰葬復誰碑。

中嶠先塋

昔遇重華席。屢前因排貴近。去翻然。叩墀袖有馳。毳疏易。簣囊無沐柳。錢當日傳家。惟諫草。至今瞻族賴。祠田原頭。宰木蒼如此。纔見山庵。尊數椽。

被酒

酒戶當年頗著聲。可堪病起困飛觥。醉呼褚令爲僮父。狂喚桓公作老兵。舊有崢嶸皆鑿去。新無壘塊可澆平。投床懶取騷經看。只喚梨花解宿醒。

夢豐宅之二首

一別茫茫隔九京。夢中慷慨語如生。老猶奮筆排和議。病尚登陣募揀兵。天奪偉人關氣數。時無好漢共功名。仍在王師老寶劍。雖埋憤未平。

斯人古少况于今。每恨諸賢識未深。朝給賻錢方掩骨。家無餘帛可爲衾。向來夫子真知己。近世門生喜負心。惟有天涯華髮掾。獨揮衰涕望山陰。

答鄭閩清

多着襦裙少裹巾。形容蒼槁意清真。舊時論語都忘記。難做淡衣社裏人。

前輩

前輩日以遠。斯文吁可悲。古人皆尚友。近世例無師。晚節初寮集。中年務觀詩。雖云南渡體。俗子未容窺。

贈徐相師

許負遺書果是非。子憑何處說精微。使君豈必如柳大。丞相元來要瓠肥。袖潤日常籠短刺。肩寒春未換單衣。半頭布袋挑詩卷。也道遊方賣術歸。

寄何立可提刑

故人握節守齊安。聞說邊頭事愈難。赤手募丁修險隘。白頭環甲禦風寒。半腰城甫包圍畢。一把兵皆點摘殘。收得去年書在架。憶君燈下展來看。

贈防江卒六首

陌上行人甲在身。營中少婦淚痕新。邊城柳色連天碧。獨必家山始有春。

壯士如駒出渥洼。死眠牖下等蟲沙。老儒細爲兒郎說。名將皆因戰起家。

昨者邳徐表奏通。聖朝除吏遍山東。新來調卒防秋浦。又與山東報不同。

自屬嫖姚性命輕。君看一蟻尚貪生。無因喚取談兵者。來向橋邊聽哭聲。

戰地春來血尚流。殘烽缺堞滿淮頭。明時頗牧居淺。若見關山也自愁。

一炬曹瞞僅脫身。謝郎棋畔走苻秦。年年拈起防江字。地下諸賢會笑人。

哭黃直卿寺丞二首

久在文公几杖旁。暮年所得最精詳。貧甘香火辭符竹。病整衣冠坐篔簹。壯士軍中悲亮死。先師地下惜回亡。法雲破寺三間屋。却有門人遠赴張。

當年出塞共臨戎。戎箭滿行營戍火紅。督府凱旋先請去。堅城築就獨無功。身謀彼此皆迂濶。國事中間偶異同。莫怪

些詞含哽噎。在時曾賞小詩工。

送章通判

半刺已官尊。常時讀魯論。身居恭叔里。心在晦翁門。貧士來遮路。詩人送出村。君能齊得喪。何必戀華軒。

聞何立可李茂欽計二首

初聞邊報暗吞聲。想見登譙與爭。世俗今猶疑許遠。君王元未識真卿。傷心百口同臨穴。極目孤城絕救兵。多少虎臣提將印。誰知戰死是書生。

何老長身李白鬚。傳聞死尚握州符。戰場便合營雙廟。太學今方出二儒。史館何人徵逸事。羽林無日訪遺孤。病夫疇昔曾同幕。西望關山涕自濡。

鄰家孔雀

愛村詩少

二十一

初來毛羽錦青葱。今與家鷄飲啄同。童子有時偷剪翅。主人常日少開籠。嶠南歲月幽囚裏。隴右山川夢寐中。因笑世間真屢錯。繡身翻得上屏風。

讀崇寧後長編二首

自入崇寧政已荒。由來治忽繫毫芒。初爲御筆行中旨。漸取兵權付左璫。玉帶解來頒貴倖。珠袍脫下賜降羌。諸公日侍鈞天譔。不道流人死瘴鄉。陳迹分明斷簡中。纔看卷首可占終。兵來尚恐妨恭謝。事去徒知悔夾攻。丞相自言芝產第。太師頻奏鶴翔空。如何直到宣和季。始憶元城與了翁。

題繫年錄

炎紹諸賢慮未精。今追遺恨尚難平。區區王謝營南渡。草

草江徐議北征。往日中丞甘結好。暮年都督始知兵。可憐白髮宗留守。力請鑾輿幸舊京。

七月九日二首

海激天翻電雹噴。蒼松十丈劈爲薪。須臾龍卷它山去。誤殺田頭望雨人。

樵子俄從間路廻。因言溪谷響如雷。分明雨怕城中去。只隔前峰不過來。

宿山中四首

城中人怪我。清旦買芒鞋。君若知其趣。還應日日来。就泉爲碓屋。纍石作書龕。有意耕汾曲。無心起水南。玉筍篆文古。銀鈎楷法精。得知千載下。時有打碑聲。婁風轉林杪。露坐感衣單。不道山中冷。翻憂世上寒。

村校書

短衣穿結半瓢空。所住茅簷僅蔽風。久誦經書皆點記。試
挑史傳亦旁通。青燈窗下研孤學。白首山中聚小童。却羨
安昌師弟子。只談論語至三公。

聖賢

聖賢自牧極卑謙。後學才高膽力兼。悔賦不妨排賈誼。謗
詩遂至勅陶潛。事見政和御史章疏取人最忌規模狹。絕物常因議
論嚴。若看國風三百首。小人賤隸採何嫌。

華嚴知客寮

簷外蒼榕六月秋。小年來此愛深幽。壞墻螢出如漁火。古
壁蜂穿似射侯。涉世昏昏忘舊話。入山歷歷記前遊。故人
埋玉僧歸塔。獨聽疎鐘起暮愁。第四句十七友今補足之 白所作

自勉

海濱荒淺幼無師。前哲籬籬尚未窺。玄詠易流西晉學。苦
吟不脫晚唐詩。遠僧庵就勤求記。亡友墳成索索碑。天若
假予金石壽。所為詎肯止於斯。

少日

少日關河要指呼。晚歸田里似囚拘。氣衰不敢高聲語。腕
弱纔能小楷書。座有老兵持共飲。路逢醉尉避前驅。子元
兄弟何為者。自是嵇康處世疎。

示同志一首

滿身秋月滿襟風。敢歎栖遲一壑中。除目解令丹竈壞。詔
書能使草堂空。豈無高士招難出。曾有先賢隱不終。說與
同袍二三子。下山未可太匆匆。

送陳寺丞守南劍

詔免延英對。輕裘見吏民。極知忙救旱。豈是急頒春。邑爲
搜空壤。州因獻羨貧。此行休戚係。未敢賀朱輪。

十月二十二夜。同方寺丞宿瀑庵。讀劉賓客集。

瀑山木落霜寒夜。共讀吾家夢得詩。坐對遺篇忘漏盡。手
遮殘燭怕風吹。森嚴似聽元戎令。機警如看國手棋。千載
愚溪相對壘。未應地下友微之。

久旱卽事

賜身下飲百川空。民自祠龍禱社公。豈是長官渾忘却。水
車聲不到城中。
輸租常占一村先。不望明時舉力田。老耄里胥如畏處。敗
人詩息攪人眠。

哭陳翰主簿

不但心孤介。生形已怪奇。在爲官長罵。沒使邑人思。魂遠
鄉猶隔。名微世未知。空存朋友誼。到此力何施。

答婦兄林公遇四首

霜下石橋滑。蛩吟茅店清。夢回殘月在。錯認是天明。
恨余行李速。愧子酒杯長。日暮于誰屋。天寒陟彼岡。
自笑如窮鬼。相從不記年。每煩詩餞送。不止辦車船。
挹君如玉雪。未易得親疎。何日溪山裏。同燈共讀書。

崇化麻沙道中

經行愛此人。煙好面俯清。溪背負山半。艇何妨呼渡去。小
橋不礙負薪還。遠聞清磬來林杪。忽有朱欄出竹間。溪處
安知無隱者。卜鄰容我設柴關。

館頭

雨雪蕭蕭驛堠長。不堪流潦入車箱。撫州城外黃泥路。卽是人間小太行。

發臨川

始予卅角來。家君緒銅墨。縣齋多休暇。縣圃足戲劇。雖云嗜梨栗。亦頗窺簡冊。弟妹俱孩幼。親髮方如漆。後予捧檄至。軒蓋候廣陌。於時志氣銳。門戶况烜赫。郡花照席紅。湖柳拂鞍碧。耆老互訊問。酒餼紛狼籍。今予挑包過城郭。宛如昔。高年彫落盡。滿眼少朋識。管子仕瘴煙。屈叟掩泉穴。真門訪舊師。日闇面黎黑。買醪與之酌。往事話歷歷。既生異縣感。復起故鄉憶。吾翁墓草深。高堂已斑白。貧居終隨空。遠遊溫青隔。二季官海濱。女子各有適。曾不如阿奴。碌碌在母側。回思盛壯時。去矣難復得。因成臨川吟。吟罷淚橫臆。

橫臆

湘潭道中卽事

敗絮龍鍾擁病身。十分寒事在湘濱。若非野店粘官曆。不記今朝是立春。

儻鼓鼙。鼙匝廟門。可憐楚俗至今存。屈原章句無人誦。別有山歌侑桂尊。

謁南嶽

中原昔分裂。五嶽僅存一。嗟予生東南。有眼乃未覩。清晨犯寒慄。馬上親歷歷。怪雲何處來。對面失齒翠。午投勝業寺。僧訝余不釋。茗餘因獻嘲。君定非韓匹。彼來旣軒露。君至若封鑄。余謂僧無躁。茲可以理詰。止僧坐悅亭。靈翳忽

水釋石廩先呈身。响嘯俄見脊。須臾天柱開。最後祝融出。
高峰七十二。固已得彷彿。鄴侯何嘗死。懶殘元非寂。恍疑
在山中。明當往尋覓。咄哉三尺雪。孤此一雙屐。駕言欵靈
瑣。樓堞晃丹赤。柏溪不見人。畫妙如新筆。珠櫳千娉婷。彈
棋撫瑤瑟。茫茫鬼神事。荒幻難究悉。吾師太史公。江淮徧
浪迹。茲焉又浮湘。汗漫恣游陟。雖然乏毫端。亦頗增目力。
規模五字體。蟠屈萬丈碧。詩成投褚中。何必題廟壁。

煙竹鋪

野迥村疎起暮寒。偶逢廢驛卸征鞍。主人家比漁舟小。客
子房如鶴柵寬。燈與鄰通眠未易。風從隙入避尤難。似聞
南去加蕭索。一夜披衣坐不安。

衡水道中二首

舍常分作兩程。雪鞭雨袖少逢晴。平生不識終南徑。來
傍湖南墜子行。
過了衡陽雁北迴。鄉書迢遞託誰哉。嶽山石鼓皆辭去。惟
有湘江作伴來。

黃熊嶺

黃茅迷遠近。不見一人行。信步未知險。回頭方可驚。路由
高頂過。雲在半腰生。落日無棲止。飄飄自問程。

零陵

畫圖曾識零陵郡。今日方知畫未如。城郭却臨瀟水上。山
川猶是柳侯餘。驛亭幽絕堪垂釣。巖室虛明可讀書。欲買
冉溪三畝地。手苦茅棟徑移居。

溪驛

去廣右界一程

苔滿朱扉半闔開。更無人迹獨徘徊。湘江臨別如相語。早買扁舟出嶺來。

全州

寂寂全州路。家家荻竹扉。異僧留塔在。過客入城稀。傳舍臨清泚。官亭占翠微。沙頭泊船者。多自嶺南歸。

春日五絕

眼邊桃李過匆匆。鏡裏衰顏豈再紅。久覺胃寒疎建焙。新因血熱戒耶筒。步入西峰不見人。數聲澗鳥自啼春。下山欲與唐碑語。先遣奴兵細拂塵。歸到城門欲發更。馬頭惟有暮鴉迎。小窗了却觀書課。幾首殘詩旋補成。

老懶何心更出嬉。閉門終日讀陶詩。湘南二月花如掃。恰似扶疎遶屋時。

曉風細細雨斜斜。僂僂書生屋角花。想見水南僧寺裏。一株落盡病山茶。

上巳與二客遊水月洞分韻得事字

勝踐造物慳。貧交世情棄。昔戒十客來。且無一人至。惟余暨兩君。鼎足坐水次。歡言天氣佳。誰謂風土異。高吟雜騷選。序酌逮晷穉。滌厓去惡詩。捫石認缺字。古來幾襖飲。傳者纔一二。蘭亭感慨多。未了生死事。杜陵更酸辛。窮眼眩珠翠。旨哉茲日遊。超然遺塵累。消搖千載後。尚有浴沂意。巖扉滑如玉。歲月可鑄識。

出城二絕

日日銅瓶插數枝。瓶空頗訝折來稀。出城忽見櫻桃熟。始信無花可買歸。

小憇城西賣酒家。綠陰深處有啼鴉。主人嘆息官來晚。謝了醪醕一架花。

武岡葉使君寄詩次韻二首

各紛紛載後車。誰能遠寄病相如。雙旌已拜湖南牧。一紙猶題嶺外書。詩句騎驢遊蜀後。情懷賦鵬弔湘餘。若還闔郡春風暖。便擬移家占籍居。

君歲建寅。豈知今作落南人。瘴來客病鄰山鬼。

託海神目送飛鸞偏戀土。夢隨畫隼共行春。新詩

寄到如雙壁。交契寧非有宿因。

移居

鄰曲無還往。何由有別情。惟應小窓月。長記讀書聲。

甲錦鷄一首呈葉任道

炎州產文雞。毛羽固天稟。朱丹飾尾距。絲繡錯襟袵。主人極珍憐。翕合分俸廩。置諸後園中。小奴司啄飲。地荒籠柵疎。客見輒危慄。黠狸出沒精。豪鼠窺伺稔。諒丞彼饑涎。或矚君高枕。駭機中夕發。果以斃來諗。裂冠首立碎。齧索聲已噤。酷哉三尺喙。殘此一段錦。長嗟命瘞埋。詎忍付烹飪。始爲文采累。終欠智慮審。老瞞戕孔公。千載憤懣懣。黃祖殺處士。瓮暴犯流品。况茲毒鷲物。尤索防閑甚。善視雙翠衣。夜涼勿嗜寢。

哭孫行之

已了燈窓債。心知舉業非。立朝多諫草。取友必深衣。藿甕

貧時其書筒貴後稀病身偏惜換一爲故人揮

象奕一首呈葉潛仲

小藝無難精上智有未解君看橘中戲妙不出局外屹然
兩國立限以大河界連營稟中權四壁設堅械三十二子
者一一具變態先登如挑敵分布如備塞盡銳賈吾勇持
重伺彼怠或持如圍莒或速如入蔡遠砲勿虛發冗卒要
精汰負非驟寡少勝豈繫強大昆陽以象奔陳濤以車敗
匹馬鄭令來一士汲黯在戲俘將策勛得雋衆稱快我欲
築壇塲孰可建旗蓋葉侯天機深臨陣識向背縱未及國
手其高亦可對狂捷敢饒先諱輸每索再寧爲握節死安
肯屈膝拜有時橫槊吟句法猶雄邁愚慮僅一得君才乃
十倍霸圖務并弱兵志貴攻昧雖然屢克獲詎可自侈汰

呂蒙能馘羽衛瓘足縛艾南師未宜輕夜半防砍寨

送陶仁父

自古送行情味惡君行快似泛仙槎新班人少先投卷下
水船輕易到家南浦不堪看草色西湖尚可及荷花諸公
若問栖栖者爲說吟詩兩髻華

移竹

借居未定先栽竹爲愛疎聲與薄陰一日暫無能鄙吝數
竿雖小亦蕭森窓間對了添詩料郭外移來費俸金自笑
明年何處在虛簷風至且披襟

題許介之詩藁

益公稱其詩

我留鶯跡外君住雁廼邊走僕行千里敲門授一編真妍
非粉黛至巧謝雕鐫何必周丞相男兒要自傳

郊行

薄有西風意。郊行得自娛。山晴全體出。樹老半身枯。林轉亭方見。江侵路欲無。何妨橋纜斷。小艇故堪呼。

老大

老大重登聘士臺。客懷牢落可曾開。臨流往往看鷺墮。入署時時見馬來。有約青山何日去。無根白髮是誰栽。自嫌不帶功名骨。只合眠莎與坐苔。

伏波巖

懸崖萬仞餘。江流遠其趾。仰視不見天。森秀拔地起。中洞既深豁。旁竇皆奇詭。惜哉題識多。蒼玉半鑿毀。安得巨靈鑿。永削崖谷耻。緬懷兩伏波。往事可追記。銅柱成浪泊。樓船下湟水。時異非一朝。地去亦萬里。山頭博德廟。今為文淵矣。謂予詩弗信。君請訂諸史。

榕溪閣

山谷南遷維舟榕下

榕聲竹影一溪風。遷客曾來繫短篷。我與竹君俱晚出。兩榕猶及識涪翁。

觀射

浪箭束如林。傍觀笑不禁。蠻平無事久。卒情可憂深。各自分牛鬪。何曾貫蝨心。种侯清澗能。費幾黃金。

龍隱洞

先賢評桂山。推爾居第一。豁然碧瑤戶。夾似雙玉壁。中有無底淵。黑浪常蕩潏。諒當剖判初。倍費造化力。雷噴斧山開。龍怒裂石出。至今絕頂上。千丈留尾脊。寧論兒女子。壯夫股為慄。我來欲題名。腕弱墨不食。摩挲狄李碑。文字尚

簡質今人未知貴。後代加寶惜。沈流工駭舟。久游覺蕭瑟。
崑室寬如家。迴權聊惕息。狄武襄公平蠻碑李師中待制
宋頌在焉

哭梁運管

似

丞相克家之孫

憶昔遊山猶昨日。奄歸白晝隔存亡。宅後外不知何病。豈
雜人爭試一方。弔客傷心同灑酒。愛姬收淚各分香。淳熙
丞相潭潭府。今日門庭冷似霜。

湘中口占

船頭吹火盧仝婢。馬後肩書穎士奴。安得世間名畫手。寫
予出嶺泛湘圖。
津吏沙邊立指呼。放船出鎖放州符。書生行李堪抽點。惹
苒明珠一例無。

見方雲臺題壁

寄書迢遞夢參差。每見留題慰所思。不論驛亭僧寺裏。有
山水處有君詩。

神陽道中

昨過知岑寂。重來况雪天。人居雞柵裏。路在鳥巢邊。草樹
開還閉。茅山斷復連。瀟江清似鏡。悔不問歸船。

愚溪二首

草聖木奴安在哉。荒榛無處認池臺。傷心惟有溪頭月。曾
識儀曹半面來。
青雲失脚謫零陵。十載溪邊意未平。溪不預人家國事。可
能一例受愚名。

湖南江西道中十首

獨醒公子去沉湘。未識人間有醉鄉。酒與離騷難捏合。不

後十首

三十一

如痛飲是單方。

賈生廢宅草芊芊。路出長沙一悵然。今日洛陽歸不得。招

魂合在楚江邊。

少陵阻水詩難繼。子厚游山記絕工。斷壁殘圭零落錦。

碑無數滿湘中。

去年冬至投僧寺。合歲陽生宿店家。獨夜無人堪晤語。青

燈相對結寒花。

蠻府參軍髻髮蒼。自調欸乃答漁郎。從今詩律應超脫。五

吸瀟湘入肺腸。

丁男放犢草間嬉。少婦看蠶不畫眉。歲暮家家禾稻熟。萍

鄉風物似湘詩。

每嘲介甫行新法。恨歐公不讀書。浩歎諸劉今已矣。路

傍喬木日凋疎。

茫茫衰草與雲平。斗氣千年不復明。惟有多情蓬上月。相

隨客子過豐城。

派裏人人有集開。竟師山谷友誠齋。只饒白下騎驢叟。不

敢勾牽入社來。

上封已失嶽僧期。客問丹霞謝不知。懶到登山臨水處。始

驚筋力減來時。

懷安道中

閩溪瘴嶺客程賒。曉泊懷安喜近家。大屋書旗夸酒米。小

舟鳴榔競魚蝦。溪移檝已臨高岸。潮退帆多聚淺沙。快着

征衫鞭瘦馬。要看二十里梅花。

真隱寺

出郭斜陽已在山。夜深乘月到江干。奴敲小店牢扃戶。僧借虛堂徑挂單。駭浪急回因膽薄。逆風小住爲心寬。投牀一枕瀟湘夢。無奈霜鐘苦喚殘。

乍歸九首

官滿無南物。飄然匹馬還。惟應詩卷裏。偷畫桂州山。兒童娛膝下。母子話燈前。却憶江湖上。家書動隔年。北戍邊城下。南游瘴海頭。不知天地內。何處可逃愁。絕愛墻陰橘。花開滿院香。鄰人欺不在。稍覺北枝傷。字若如天馬。軒昂不可羈。爲貧疎飲客。因病出名姬。弛檐逢除夕。檀爨共擁爐。把如爲客看。還得似家無。架書多散亂。信手偶拈開。匹似前生讀。茫然記不來。手種梅無恙。蒼苔滿樹身。可憐開較早。不待遠歸人。

格力窮方進功夫。老始知儘教人貶駁。喚作嶺南詩。

挽方孚若寺丞二首

使君神雋似龍麟。行地飛空不可馴。詩裏得朋卿與我。酒邊爭霸世無人。寶釵去盡中年病。珠屨來疎晚節貧。昔共誅茅聽瀑處。溪雲谷月亦悲辛。斯人詎意掩斯丘。六合茫茫不可求。射虎山中如昨日。騎鯨海上忽千秋。帝方欲老長沙傅。尚能言博望侯。回首瀨溪溪畔路。跛驢無復從公遊。

挽方武成

少角詩名出。流傳海內誇。師稱起予者。翁問倩人邪。惜未參諸老。猶堪擅一家。從今崖瀑上。誰共訪梅花。

壽昌

山路泥深雪未乾。病身初怕浙西寒。新年臺曆無人寄。且就村翁壁上看。

記夢

父兄誨我髣髴初。老不成名鬢髮疎。紙帳鐵檠風雪夜。夢中猶誦少時書。

杜丞

憶冒重圍入。孤城賴不亡。戰功何日賞。微草至今藏。舊事歸詩卷。新寒入箭創。江邊逢杜杲。髣髴各蒼蒼。

久客

久客長安市。人情薄似雲。寧爲絕交論。不著送窮文。白髮長千丈。黃金盡百斤。故山春事動。深恐廢耕耘。

贈陳起

陳侯生長紛華地。却以芸香自沐薰。鍊句豈非林處士。鬻書莫是穆參軍。雨簷兀坐忘春去。雪棹清談至夜分。何日我閒君閉肆。扁舟同泛北山雲。

贈翁卷

非止擅唐風。尤于選體工。有時千載事。祇在一聯中。世自輕前輩。天猶活此翁。江湖不相見。纔見又西東。

題壁

兒時挾彈長安市。不信人間果有愁。行遍江南江北路。始知愁會白人頭。

挽李尚書二首

韓范止如此。公乎事又艱。不陪治城廟。合殉定軍山。璽出千官賀。弓藏一老閒。琚戈提十萬。猶記凱歌還。

幕下多材雋。于今盡策勛。可憐狂處士。曾揖大將軍。久戍
兒郎老。新招部曲分。此生甘寂寞。有淚濕高墳。

哭左次魏墓

甫痛何郎天。丘明亦復然。因思題墓上。不若鬪樽前。劍馬
為誰得。琴書有女傳。惟應千載下。酖食雪堂僊。君與何立
同幕。相繼歿于齊安。

寄永嘉王侍郎

珍重西清老。書來訪薜蘿。為邦應好在。作佛竟如何。花押
常衙少。柑香盡坐多。聞公須尚黑。未害吓婆婆。

秋熱憶舊遊

塞上秋光冷似冰。當年豪舉氣憑陵。打不用炎方馬。按
獵初調異國鷹。山寒淒涼開戍鼓。水村打霜落見漁燈。而今

病榻茅簷底。追記猶堪洗鬱蒸。

哭李景溫架閣大有

挾策說荊州。那知亦閭投。漫招溫處士。幾殺杜參謀。出幕
有清議。還鄉空白頭。人間容不得。下與阿翁遊。建寧丞相
其祖也。

送符約赴衢教

博符非如吏。巍然道自居。諸生趨避席。太守揖升車。朱筆
濃批卷。青燈細勘書。漢廷重文藻。行矣召嚴徐。

送張應斗還番禺

萑荔漫山霧雨繁。虬鬚客子悔南轅。久留閩國誰堪語。却
憶番君可與言。豪傑雖窮留氣在。聖賢不死有書存。歸時
洗換征衣了。揀箇深山緊閉門。

為圃二首

屋邊廢地稍平治。裝點風光要自怡。愛敬古梅如宿士。龔
持新筍似嬰兒。花窠易買姑蘇價。亭子難營且築基。老矣
四科無入處。旋鈕小圃學樊遲。
衰病歸來占把茅。譬如僧葺退居寮。因存橘樹斜通徑。怕
礙荷花小著橋。古有功名興釣築。今無物色到漁樵。可憐
歲晚閑雙手。種罷蕪菁種菊苗。

挽表叔趙君任安撫 繪忠節孫

叔在兵間日。書常笑我虜。初云機會易。晚歎事功難。寂寞
郎官省。荒涼上將壇。進憐會稽寔。新種短松寒。

蘇李泣別圖 方字若故物近為人取去

風雲慘淒草樹枯。死節鳴馬嘶弦驚。鶻起熟看境色非。人
間和連山下想如此。手持尊酒別故人。此生再而真無因。

見漢兒俱動色。路傍觀者為悲辛。歸來暗灑茂陵淚。子

孟少叔方用事。白頭屬國冷如冰。空使窮廬歎忠義。泫泫

事往賴畫存。每愁歲久縑素昏。即今畫亦落入手。古意淒

涼誰復論。

芙蓉二絕

湖上秋風起。擢歌萬株映柳。更依荷。老來不作繁華夢。一

樹池邊已覺多。

池上秋開一雨叢。未妨冷淡伴詩翁。而今縱有看花意。不

愛深紅愛淺紅。

同鄭君瑞出瀨溪即事 四首 方字若新序

汗血名駒白玉鞭。本初父子喜華鮮。只今無復狂遊侶。自
卸驢鞍古店前。

鐵馬防秋記昔曾。晚途消縮似寒蠅。同時校尉俱封拜。誰
伴將軍獵霸陵。
北耗而今杳不知。路傍羽檄走無時。自憐滿鏡星星髮。羞
見官中募士旗。
老奴昔逐我西東。捷似猿猴跳絕峰。今日道旁扶一拐。乃
公安得不龍鍾。

明皇按樂圖

鶯啼花開春晝遲。掖庭無事方遨嬉。廣平策免曲江去。十
郎談笑居台司。屏間無逸不復覩。教雞能鬪馬能舞。戲呼
寧哥吹玉笛。催喚花奴打羯鼓。南衙羣臣朝見疎。老伶巨
璫前後趨。阿瞞半醉倚玉座。袖有曲譜無諫書。金盆皇孫
真龍種。浴罷六宮競圍擁。惜哉傷有錦綉兒。蹴破咸秦跳
河隴。古來治亂本無常。東封未了西幸忙。輦邊貴人亦何
罪。禍胎似在偃月堂。今人不識前朝事。但見斷縑粧束異。
豈知當日亂離人。說着開元摠垂淚。

卽事四首

買得荒郊五畝餘。旋營花木置琴書。柳能樊圃猶須種。蘭
縱當門亦不鋤。無力改牆姑覆草。多方存井要澆蔬。區區
才志聊如此。誰謂先生廣且疎。

目爲詩客不勝慙。喚作園翁定自堪。抱甕荷鋤非鄙事。栽
花移竹似清談。野人只識羹芹美。相國安知食笋甘。富鄭公事

晚覺齊民書最要。惜無幽士肯同參。
墻角新開白版扉。時尋樵牧弄煙霏。代耕豈若收躬稼。賜
帛何如出自機。湖海浪遊今已倦。山林獨往未全非。百年

只願身強健。長爲慈親負米歸。
待鑿新池引一灣。更規高阜敞三間。縮牆恐犯鄰家地。減
樹圖看屋後山。身隱免貽千載笑。書成猶要十年閒。門前
驀有相尋者。但說翁今怕往還。

書事二首

竭海夷山氣力雄。只愁無術駐顏紅。却須擘劃千餘歲。多
買丹砂置女僮。章子云。人生豈不能擘劃得二三百歲。
因治陶朱術太精。世間無物足經營。更將郭璞書頻看。只
恐青山盡鑿平。

再和熊主簿梅花十絕

詩至梅花已過。因觀海棠。

色淡乍擣守宮紅。片細俄隨蛺蝶風。到得離披無意緒。精
神全在半開中。

薔薇難比况金沙。一種風標富貴家。我有公許君記取。惜
花須惜海棠花。

千株絳雪照滄灣。應笑劉郎帶老顏。尚有少年情味在。戲
搜綺語續花閒。

鳳州宮柳昔曾攀。亦醉瓊花芍藥閒。獨有海棠心未足。每
逢多處必來看。

別園水竹絕幽清。花徑繁紅蘚砌青。何處貴遊開步障。誰
家生色畫深屏。

徙倚溪亭惜墜芳。恨無異域返魂香。殘枝併恐風吹去。挿
在金瓶置坐傍。

忽憶聯鞍過水西。重尋前約未參差。祇愁人議風流罪。屢
出看花數賦詩。

淡賞無煩羯鼓催。解鞍便可坐莓苔。莫將花與楊妃比。能與三郎作禍胎。旋挑野菜拾青梅。又向花邊得暫陪。各選一枝簪白髮。明年知與阿誰來。君憶東湖不久歸。我思陳迹恍難追。殷勤爲報鶯花說。止有詩情似舊時。

贈高九萬并寄孫季蕃二首

諸人凋落盡。高叟亦中年。行世有千首。買山無一錢。紫髯長拂地。白眼冷看天。古道微如綫。吾儕各勉旃。菊圃說花翁。飄蓬向浙中。無書上皇帝。有句惱天公。世事年年異。詩人箇箇窮。築臺并下榻。今豈乏英雄。

答惠州曾使君韻

